


PL  
1420  
F35  
1666  
v.10









通雅卷之二十一

桐山方以智密之輯著

同里姚文燮經三較訂

姓名 同姓名

同時及異代同姓名。○湘東王有同姓名錄如顏回為羌帥曾

參為市人平原哭墮井之毛遂翟公疑秋胡不許婚是也。卮言

列之。兩韓信俱高時。一楚王。一韓王。智按史通言名信都又誤矣三召平。一

故秦東陵侯。一為陳王上柱國。一齊相。按為陳王柱國。謂為陳勝。徇廣陵者。見項籍傳。

齊王相見齊哀王傳。恐東陵侯即陳封者。秦自王翦父子外。少微侯矣。不應有東陵侯。兩王恢俱武帝時。

一浩侯。一大行謀誘比軍者。兩王臧。武帝朝。一郎中令。二季自



殺一六季爲太常兩王商俱成帝外戚一丞相樂昌侯一成都侯兩王章俱哀帝時一建平三季爲右將軍一四季爲京兆直言苑兩王崇俱平帝時一丞相嘉子一大司空扶平侯兩王莽一見霍光傳崇禎時見賀無黨疏用之相公不知而擬票切責魏兩王烈一字彥方化

盜一有道術謂嵇康不遇者兩王渾一戎父一濟父兩王澄一濟弟一戎從弟兩孫秀一吳降將一趙王倫嬖臣俱驃騎封侯兩周撫一王敦將一彭城內史誅梁兩王琳一散騎常侍一德州刺史唐兩李光進俱代宗朝一爲光弼弟一爲光顏兄俱蕃將賜姓爲節度封公兩李繼昭俱昭宗時一爲孫德昭一爲符道昭俱賜姓名降朱梁爲使相宋兩王著俱太祖時一以文學



典制一以書學待詔又曰兩慶忌一王僚子一夫差將智按山澤鬼善

走曰慶忌呼其名可使兩莊躋一莊王時盜一莊王裔孫平渙千里徃報故人取名

兩王鳳一元后父一為夏始成國上公兩王譚一宜春侯一平

阿侯兩徐幹一作中論一班超司馬智按張懷瓘載徐幹字伯張善章草班固與超書稱

之蘇班皆為張伯英所稱歎晉兩劉毅一光祿大夫一衛將軍兩張禹一丞

相一太傅俱封侯兩解系一見陶璜傳一自有傳兩王愷一戎

帝舅一安帝時為丹陽尹兩蕭鈞一蕭鸞子一蕭瑀從子元兩

伯顏一太傅淮陽王一大丞相秦王兩張昌宗一高宗初學士

一則天時兩王方慶一則天時相一領尚藥奉御若異代同姓

名者兩王肅一曹魏一元魏兩王彥章一梁將一吳統軍兩王



溥一唐懿宗朝一周世宗相兩李通一漢一魏兩王孫賈一魏  
大夫一齊大夫兩徐邈一魏字景山一晉字仙民兩張遼一魏  
一漢兩江革一漢一晉三李密一養祖母一後魏一隋末又不  
杜此例則元瑞所彙有八李祐六李福四李晟李紳豈止兩副  
座頭俱李益邪元瑞曰三孫子三鄒子世所共知又有不得不  
辯者二孔甲一黃帝史一仲尼孫俱著書名盤盂一載藝文志一附孔叢子  
二牟融一漢大尉一布衣俱書曰牟子一載隋藝文志一附弘明集中今藝文志之牟  
子不傳而弘明集之牟子傳遂以釋之牟子傳儒之牟子矣又夏帝名孔甲而唐詩人有牟融尤奇孔叢之盤盂疑崇文日誤而弘明之牟子余疑爲僞兩嚴遵一君平一子陵皆易姓君平一名尊一名允亦見傳中智以爲或相慕或附會而訛兩樊崇俱賊帥一赤睂一尤耒兩李育俱賊將一



屬王郎一屬公孫宋兩李定一彈蘇子美一彈子瞻

李定劾蘇舜卿見朱

子語錄

兩韓文公一昌黎一南唐熙載兩少室山人一李筌一李

渤兩呂東萊祖居仁孫伯恭俱以東萊名集兩石林居士一吳

縣人伋執政見宋史一松江人官至尚書見一統志

皆名夢得皆從湖州

陸文裕外集載之此亦漢之兩杜子夏也

兩李商隱一玄宗朝見舊唐書一義山兩

李抱真一抱玉弟一李匡威寮屬兩李克寧一李澄子一克用

弟兩李伯禽一太白子一見通幽記智按此類甚多如史記兩

淳于髡一見孟子傳後一見滑稽三國志兩王雙蜀斬王雙而

吳亦斬其將王雙必二人也陶弘景刀劍錄有王雙與曹真換

刀王胡皆未載然胡所編爲功亦夥洪洲全搜依然有漏惟取



全史作通編始成全書今特撮其要者以便觀覽耳

向聞甬東余寅僧果

有同姓名錄萬曆間人又南昌宗侯統稽有同姓名錄十卷專門輯此廣昌劉大千作古今代譜亦集之須資其本再考焉

七修類藁言漢高帝有謁者貢禹成帝時王褒朱買臣元帝時

有尚書左僕射王褒成昌太守朱買臣智又按梁元帝遣朱買

臣嘗以楊何弟子之京房

宣帝時

公孫康所遣之張敞

在度傳

最易

混目近見人論賈充之父通經漢臘之人非譌則以兩賈逵兩

陳咸爲一矣

逵一漢人一魏人咸一相人萬季子一汶人見陳寵傳

諸公擿辯大有益于

學者元瑞言五王褒而漢有三一字子淵成帝時人上得賢臣

頌者一字子澄成帝時人得道治王屋山與郊祀志之王褒爲

三又後周王褒字子淵唐避諱改子深智按郊祀志者卽五行



志之天帝使我居此者。以上得賢臣頌之王褒。爲成帝時則非矣。褒傳魏相奏知音趙定龔德等。刺益州王襄。乃請子淵作中和樂章。乃徵之。此宣帝時人。元瑞又言三王建。

一晚唐詩人。一唐末據蜀。一石

晉隸州刺史。見唐餘紀。

前漢表元延元季。有廣陵太守王建。爲京兆尹。反

遺之。而路史言有十餘。可見淹攷一事。須暇豫彊識藏書最富。乃能勝任耳。路史曰。昔聞唐堯虞舜矣。梁史又有虞舜。官丞太常。薦明堂之議。而漢夏有唐堯爲臨。或長堯舜而可名哉。予旣述祝融。共工。帝魁。青陽。高陽。渾敦。夏后啓。商湯。有巢。承韋之不同矣。如劉弘王褒。皆有十一。張良有九。而張敞王吉。皆有八。士勾相鞅。壽夢。臣越。書才四代。載兩伯夷。而論語有兩南宮适。王



羲之仕苻健張華之佐慕容德皆其類也蕭繹陸善終俱著同

姓名錄然特不能包刺請誦其涉史曰古有庸成氏而黃帝臣

亦曰庸成伏羲曰蒼牙而大雷之吏亦曰蒼牙羲臣曰巫咸而

未父商家帝臣曰朱宣而為唐刺濮離婁事黃帝則論彼商臣

張若事黃帝則指夫秦士趙隱仕商國而亟舉魏賢馮夷友費

昌而竟談河伯覩叔均而思稷子山海經商均曰叔均見習朋而思齊臣

贊風后而為軒師禹時有風后疑伍胥為楚族黃帝臣有伍胥謂赤松為炎

帝諸侯王初平亦號赤松季連為柳惠等伍陸終之子曰季連又季克之子亦名仲衍為

戲之弟紂兄亦曰仲衍孔甲為孔子之孫孔子八世孫名鮒帝嚳之臣有窮之

君俱曰羿以射名少昊之子魯國之士皆曰般以巧著虞仲之



孫實曰虞仲蔡昭侯申實蔡文侯申曾孫之子也漢趙王如意

而廣宗又名之唐義成曰琮矣而奉天又名之鬱林曰恪矣而

建王又名之此何為邪晉王氏一譜有兩渾和子兩愷一字茂

君兩綏愉子兩父緒父兩澄濟弟兩處仲一激字兩安期湛子

豈惟他族慕用而無識哉智按所云兩渾之類非矣晉書昶子

渾字玄冲太原晉陽人渾弟湛去聲字處冲非處仲也王濬冲父

渾乃瑯琊臨沂人澄字平子而王玄冲之弟亦名澄烏得謂大

原王瑯琊王為一族乎其曰漢唐堯為臨邑長者亦誤按後漢

書和帝紀舊南海獻龍眼荔枝以臨邑長唐堯上狀省之章懷

注云堯得報即棄官還家今乃以堯為堯注止引范志范乃據



後漢書羅偶見本訛耳。且堯舜爲名甚多。不足異也。漢趙堯趙禹。張禹。絮舜。又永光元年。奉大司農堯。元延元年。奉護軍都尉甄舜。綏和二季。執金吾謝堯。爲大鴻臚。宋制科題有堯舜禹湯所舉何如。乃魏相引高帝時言。官中謁者趙堯。舉春。李舜。舉夏。倪湯。舉秋。貢禹。舉冬。各職天子所服也。如此類。可盡數邪。又按有同名稱。不必實同姓名者。有四孔子。朱張楊震。劉現。迦葉。三顏子。孔融。王憲。兒童。四曾子。漢成都張霜。號張曾子。北朝南昌滕曇恭。號滕曾子。平棘李士謙。其伯父楊曰吾曾子。唐桐廬陳京曰如曾子。孟子字子與。曾子亦字子輿。孔伋字子思。秦人葵。級亦字子思。級亦從學聖門。如是者。亦不可勝數。



兩羿。○一弑夏后者。一堯時射落九鳥者。見天問注。或以琴譜之。羿爲三蓋卽有窮也。說文引弩善射。按其辭曰。羿射日落九鳥。以羿射爲句。一日而落九鳥。非射日也。後人誤讀耳。

扁鵲秦少齊。○成式笑任道昇呼扁鵲爲扁。後讀甄大言本州。引曹憲音布典反。乃信之。又言扁鵲姓秦。字越人。扁縣。郡屬渤海。智按地志無扁縣。而周禮釋文引史記姓秦。名少齊。越人。此爲近之。然今史記無少齊二字。其曰扁鵲者。黃帝時有扁鵲。而秦越人在戰國時。人號之爲扁鵲。今所傳難經。乃越人作。非黃帝之扁鵲也。託名耳。宋雷斅作炮炙三卷。亦非黃帝時之雷公。漢志有黃帝扁鵲俞附方。隋志有雷公注神農本艸四卷。此乃



非戰國之越人。宋之雷斅然必僞託者。師古注人表輪邊卽輪扁。扁音偏。足知古皆平聲。其作鴈者。海篇之誤收也。

兩士句。○昭六年左傳齊侯如晉。請伐北葵也。士句相士鞅逆諸河。禮也。疏曰士句是范宣子。卽士鞅之父也。不應取其父同姓名人。以爲介。董遇王肅本作王正爲是。王元規云古人質口不言耳。何妨爲介。按士文伯是士鞅之族。亦名句。今相范鞅卽文伯也。魯仲嬰齊莊之孫。卽公孫嬰齊之從祖。鄭公孫段字子石。而印段亦字子石。古人自不爲嫌。

兩張祿。○范曄入秦爲張祿。學者蓋不知秦先時自有張祿也。初孟嘗君悅張祿先生。奉之黃金文織。祿辭不受。謂孟嘗君曰。



秦四塞國也。遊宦者不得入焉。願爲吾爲丈尺之書寄我于秦王。徃而遇乎。固君之人也。徃而不遇乎。雖人求閒謀。固不遇矣。孟嘗君因爲之書寄之秦王。徃而大遇。考田文之卒。在范雎未入秦之先。則張祿入秦居雎前久矣。雎入秦。踵名張祿。豈祿嘗有聞于諸侯。秦特令雎冒其名以誑鄰國邪。此筆乘抄之兩山墨談者。

五公孫弘。○一在齊爲孟嘗君見秦昭王。一在中山爲參乘。言司馬喜相求。其一在越斷髮。其一爲漢平津侯。其一明帝時幽州從事。交通楚王英。見虞延傳。弘字次卿。見鄒長倩書。此平津侯也。



著書之張萬福不必或將。五代之酈炎集不必東漢之文勝也。  
○長睿譏崇文總目。張萬福唐人有傳。而云不詳何代人。酈炎  
集當在前。謂爲字文勝者也。按有三張萬福。一德宗朝救陽城  
人所共知者。一與柳芳同時。見酉陽雜俎第七卷。以醫名。一撰  
五等朝儀。見通志略。乃道家者流。又通志五代有酈炎集。後漢  
亦有酈炎集。或五代時有同名者。未可知也。升菴以薛仁貴能  
詩。安知不更有一仁貴耶。正與張酈同類。

兩智永。○元美曰。一梁画僧。一宋書僧。按智永禪師。右軍徽之  
後。安西成王諮議彥祖之孫。廬陵王胄昱之子。謝少卿之外孫  
也。與兄少賓俱出家。當梁時。歷陳閱隋。季百餘。乃終。研北志云。



智永本名法極。但著心成頌。其一無所爲。而姑以筆簏游于天地之間者乎。宋智永見鄧椿公壽。画繼。成都僧也。宇文季蒙龍圖請住院。永辭曰。永親在未能也。嘗作瀟湘夜雨圖。上邵西山。

姓名 鬼神

鍾馗。一作鍾葵。終葵。○唐人題吳道子畫鍾馗曰。明皇驪山還宮不懌。因店夢大鬼制小鬼。吳道子畫之。熙寧五年。上令画工模揭錢版。印賜兩府輔臣各一本。是歲除夜。遣入內供奉官梁楷。就東西府給賜鍾馗之象。觀此題。似始于開元。李石曰。北史堯暄。本名鍾葵。字辟邪。于勁字鍾葵。宋宗慤母妹名鍾葵。按皇祐中金陵上元縣發一塚。有一石志。乃宋征西將軍宗懿母鄭



夫人之墓。漢大司農鄭眾女也。懿有妹名鍾馗。智以此卽李石所云宗慤妹。懿慤字近也。漢鄭眾相去遠。或其曾孫女乎。後漢有李鍾馗。隋將有喬鍾馗。楊鍾馗。然則鍾馗之名。非起開元。升菴引杼上鍾葵首。鍾葵菜。止證其有此譚語也。元瑞曰。六朝已有鍾馗。後人附會作傳。諸取名者。皆以鬼神爲名也。硯石鍾馗。以其形耳。周禮注齊人謂椎曰終葵。

神茶一作茶與。鬱壘鬱雷鬱樞鬱律。○山海經二神。神茶鬱壘。升菴引風俗通作鬱律。陸法言韻壘音律。神茶者神舒也。沈休文曰。鬱壘者屈律也。又爲黶黶。王充云。鬱壘嶢嶢之類。沈又作黶黶。古文作宛律。智按演繁露曰。東海度朔山大桃二神。一曰



茶與一曰鬱雷王赫作鬱樞引括地志曰度朔桃二神一名鬱  
一名樞鬱壘屈律音轉隨人分合隨人書名耳唐人尚有屈律  
語紀事曰田八二十一果頭三屈律言黃巢也

巢殺儼鬼○東方朔罵鬼書有巢殺傖儼之名按卽果毅二字  
後人造此字以名鬼耳陳無功引作巢殺儼鬼或曰巢音拂

竈圖一作竈圖○裸俎人影九重皆有名第七重曰竈圖以其

么小而幻故作圖

音么

回祿謂吳回祿終也○吳曾曰楚世家云顓頊生稱稱生卷章  
章生重黎黎爲高辛氏火正帝嚳命曰祝融共工氏作亂帝嚳  
使重黎誅之不盡帝乃以庚寅日誅重黎而以其弟吳回爲重



黎後復居火正爲祝融。吳回生陸終。終生子六人。六曰季連。楚其後也。可知祝融後爲吳回陸終。回祿合稱。祿陸音通也。故今稱火災曰回祿。

張僊乃孟昶。○花蕊夫人入宋宮。懸故主蜀王挾彈圖于壁。卽孟昶也。藝祖詰焉。夫人曰。蜀祀張僊神。令人有子。蜀人劉希召秋官說。蘇老泉時去孟蜀近。應知之。

水神屬陰。故曰天妃。今以爲林氏。○天妃宮。江淮閒濱海多有之。其女子三人。俗傳神姓林氏。遂實以爲靈素三女。太虛之中。惟天爲大。地次之。故天稱皇。地稱后。海次於地者。宜稱妃耳。蓋所祀者海神也。元用海運。故其祀爲重。司馬溫公謂水陰類神。



當爲女子。或云宋宣和中遣使高麗。遭颶風。賴神以免。使者路允迪言于朝。始有祀。一統志云。天妃。宋巡檢林愿女。按宋時巡檢。今都撫類。

馮夷。河伯。有多名。○穆天子傳作無夷。山海經作冰夷。河圖言姓呂。名夷。淮南作馮遲。音憑金匱言名馮循。元瑞曰。竹書洛伯

用。與河伯馮夷闕。河伯自爲諸侯。而馮夷原諸侯姓名。智又按淮南馮夷。大丙之御。容齋隨筆曰。此別一馮夷。或諸侯同名。干寶言。宋時弘農馮夷。八月上庚溺死。天帝署爲河伯。五行書曰。河伯。庚辰日死。不可治。船遠行。梁簡文帝船神記云。船神馮耳。智按俗呼耳。與以混。故馮夷訛馮耳。河自神。而名則附會也。



梓童神張亞子。一作蛩子。○其所注化書名揮。始造弦。張網羅。因以張爲姓。張仲事宣王。幽王初。以直諫賜死。爲雪山神。尋爲趙王如意。又生嫁張翁。陷城邑。救父母。以殺多譴。爲邛池龍。遇釋迦脫罪。又生西晉時。跨白驢去。又見姚萇。按王氏見聞所載。陷河神張惡子。事略類。惟云雋州。不言邛池。北夢瑣言。梓潼張蛩子神。乃五丁拔蛇之所也。一統志。建炎以來。景封。

晏公爲水神。○元人尸解。江楚祀之。明封爲平浪侯。

楊回卽王母。○集仙傳言王母姓侯。而西陽襍俎言王母姓楊。名回。字婉妖。按郭璞注爾雅。以西王母在西。山海經言虎齒有尾。曰西王母。此謂外國之人耳。穆天子傳西王母。正如外國之



君長後乃附會以與東王公相對。  
麻姑兩說。○建昌府志麻姑爲王方平之姝。而黃州志云麻姑  
乃石勒麻秋之女。魯公碑降括蒼蔡經家。建昌志又云降吳門  
蔡經家。此魯公筆神耳。

城陽景王江左憤王江神子胥。漢壽關帝水府屈子。○卮言曰  
古稱生爲名臣。歿爲名神。其最炳著者。北土則城陽景王江左  
項王神於吳興尤烈。及江神伍員。按景王卽朱虛侯劉章。平呂  
氏亂封王。二季而卒。項羽據吳興太守正衙爲祠。太守屢任殺  
車牛祭。不然卽死。而臨汝侯蕭猷至。每享神對飲。神像亦色赭。  
嘗爲猷破盜。智又按南史蕭琛傳。吳興名項羽爲憤王。琛遷之。



于庶。卒無恙云。子胥有素車白馬驅江潮之異。故祀爲江神。唐狄仁傑采訪江南。盡毀諸淫祠。獨畱員及泰伯季札祠。而移檄項王毀其庶。按吳興項王碑陰有顏魯公題云。西楚霸王。秦末與叔梁避仇吳中。蓋湖州也。觀此題。則顏公時廟尚在。豈狄公旣毀。而湖人竟復之邪。關壯繆侯羽。至隋世于荊州玉泉寺見靈跡。至宋崇寧時。帝勅天師張虛靖召關羽破蚩尤。復塩池。見靈。遂封崇寧真君。永樂北征。本雅失理。經濶灤海。幹難河。勒銘禽巫山。每見神前驅如關公。其馬白。凱還。居民言有白馬。大正陽門殿。至暮汗出。乃制崇祀。五月十三祭。萬曆四十二年。遣司禮李恩捧旒袍封大帝。水府庶爲屈平大夫。各處祀之。



張天師陵之後也。○正一嗣教大真人張氏始祖張陵與張角同法。持九節杖爲符。祝病人叩頭思過。以符水飲之。爲三符。一著山上。言天也。一埋地。一沈水。曰三官。病者家出五斗米。智按三國志裴注。角事露至。反族滅。而陵在蜀。僻傳子衡。孫魯。遂據蜀。漢垂三十季。曹操破之。請降封侯。傳國至唐宋間。復世掌道教。李膺蜀記云。張陵避瘟丘社。得咒鬼書。遂解使鬼入鵠鳴山。自稱天師。漢熹平末。爲蟒蛇所噉。子衡奔走尋屍無所。乃假設權方。以表靈化。生縻雀跡。置古崖頂。光和二季。遣信告曰。正月七日。天師昇玄都。衡爲係師。魯爲嗣師。以遂惑天下。李膺非元禮。漢蓋有兩張衡。兩李膺也。而隋又有張衡。南史又有子平。張



衡亦字子平。爲漢刺史仙去。道家因附會之。

靈濟二真君。○太宗嘗夢二神人言南處海濱。來輔家國。明日禮官言閩中靈濟二真君事。遂遣使函香請神像。作宮祀之。英宗初加封。記稱南唐義祖之子知證。封江王。知諤。封饒王。按南唐書。知證後封魏王。

真武帝君。碧霞元君。○武當岱嶽。今最感重。永樂建真武廟于太白山。幾塌府庫。設大璫及藩司守之。而二廟歲入香銀亦以萬計。真武封號且百字。蓋北方玄武神。以避宋宣祖諱。改真武。龜蛇表北方耳。碧霞元君。起于華山小石池。冬夏不涸。號玉女洗頭盆。因附會爲王母七女。訛而爲泰山。按神異經云。西方大



荒中有聖人焉。長丈。腹圍九尺。踐龜蛇。戴朱鳥。然則後人于大石中得龜蛇像。歸之真。或者疑卽此徵也。若謂神農時有淨樂國王。皇后之說。尤不經矣。或當又有謝允仙事。故名謝羅山。甄異記甚詳。而酈善長謂爲羅令。續搜神記言謝允從或當山。在桓宣處坐。言及左元放爲曹公致鱸事。

老子名號。○名耳。字伯陽。一名雅。字伯宗。一名志。字伯光。一名石。字孟公。一名重。字子文。一名定。字元陽。一名元。字百始。一名

顯。字元生。一名德。字伯文。

玄妙篇云。初生時名玄祿。

其化生曰萬法天師。曰

盤古先生。有古大先生。曰鬱華子。曰大成子。曰廣成子。曰隨應子。曰赤精子。曰錄圖子。曰務成子。曰尹壽子。曰真行子。曰錫則



子。曰燮邑子。曰育成子。曰經成子。曰郭叔子。曰河上公。云三皇時曰玄中法師。金闕帝君。或云化爲范蠡。又云周文王時爲守藏史。昭王時過函谷關。又降蜀青羊肆。會尹喜同渡流沙。穆王時復還中夏。平王時復出關開化蘇鄰諸國。還中夏。秦時兩度散關。蓋過函谷者一。而出散關者三。老子母曰玄姁玉女。亦稱尹氏。化胡經稱老子投淨妙夫人體爲釋迦。顧歡所舉者也。又按前涼錄。老子父名乾。字元杲。遷疑眡。卽太史儋。班因以太史儋列中上。與孟子同時。而孔子時無眡。

王喬不一。○七修類稿曰。漢明帝時。葉令王喬。乃飛舄者。周時王子喬。乃吹笙者。神仙傳。蜀人王喬。乃食肉芝者。史記封禪書。



注緱氏仙人庵王喬。犍爲雒陽人。凡四王喬。元美載二。元瑞載三。王子喬卽晉王非姓也。又王喬有弟。周益公跋大皋渡永興觀舊碑。王仙諱子繇。字大皋。廬陵有王山。王田村。嘉福觀大皋度。值夏市。皆其迹也。碑謂晉永嘉飛升。而郡人葛導岷云。漢王喬至晉永嘉二百餘年。按湘東王古今同姓名錄。有晉廬陵太守王喬。仙其太守弟邪。而大皋爲渡。略見南史。乾通五季記。羨門。○司馬相如傳。注羨門。偃石山十仙人。羨門高也。問奇音延。則此仙居羨道也。

車子侯。○漢武帝與奉車子侯登泰山封禪。後暴卒。奉車者官也。子侯者小侯也。霍去病之子。仙傳因誤爲車子侯。曰扶風人。



漢武帝稍遷其位至侍中一朝仙去其誤如此

洪崖有二○郭璞詩所稱者姓張或云黃帝之臣伶倫也又云神農師堯時已三千歲矣漢武時入華山尋其叔叔卿眞誥云洪崖先生今爲洞眞其隱跡在豫章西山洪井在伏龍山宋人畫跨白驪衣紅蕉葛衫從者五人曰橘栗木葛拙負六角扇垂雲笏方木鐙二玄書此張蘊也筆叢以爲唐張氲號洪崖子世多以堯時之洪崖姓張亦猶金華之皇初平號赤松子而劉孝標遂以金華赤松子爲雨師也初平之兄初起亦改名魯般

罔象方相罔像仿像稍異○周禮方相氏掌逐疫鬼作罔像莊子失元珠罔罔象孔叢子水石之性龍罔象又晉書載紀劉元



海傳仿像相符。杜甫溪陂詩仿像識鮫人。郝氏以爲罔象卽仿象方相。智按方相卽俱頭也。因彷彿罔象而名之。荀子曰面如蒙俱。南史沈雲禎傳葬不須轎車靈舫魃頭也。孫恂收顛側魃而無俱。蓋一字也。恂偶遺耳。成式曰儻一名蘇。一曰狂阻。一曰觸壙。費長房識李娥藥丸謂之方相腦。

罔兩作方良。罔窻罔閭。蜎蜎魃魃。○左傳蜎魃罔兩。通作方良。見禮注。張衡東京賦斬委蛇。腦方良。淮南道應訓南遊乎罔窻。史相如哀二世賊。精罔閭而飛揚。史孔子世家夔罔閭。魯語作蜎蜎。家語作魃魃。

商羊畢方。橐蜚。驚水火之怪。皆如鳥一足。○尸子木之精爲畢



方一作必方。淮南注木精如鳥一足。方朔所對卽此也。見則邑有譌火。孔子言商羊一足。何水火之怪皆一足邪。橐蜚亦如梟一足。又山蕭鳥臨海志有獨足鳥。聲如人。將雨轉鳴。是商羊也。唐韵曰鶩土精也。似雁一足。黃色。薛綜注東京賦魃蜚小兒鬼。畢方老父神如鳥一足。銜火作災。陳後主時一足鳥集殿。以紫畫地成文曰獨足上高臺。盛艸變成灰。

藻兼卽藻廉。水木之精。○見幽冥錄。東方朔所言也。唐陸助集異志拾遺記作藻隸。各類書作藻廉。

甲作腓。胄雄伯騰蘭攬諸伯倚疆。梁祖明委隨錯斷窮奇騰根。十二皆儼神。○後漢禮儀志逐疫中黃門倡佉子和曰甲作食。



殤腓胃食虎雄伯食魅騰蘭食不祥攬諸食咎伯倚食夢疆梁  
祖明共食磔死寄生委隨食觀錯斷食巨窮奇騰根共食蠱按  
段安節樂府襍錄曰甲作食凶者腓胃食夢者騰蘭食不祥者  
攬諸食名者祖盟強梁食其磔死寄生者桃根食虎者與柯古  
所引字亦微異

倍阿屋東北方鬼○莊子倍阿魍魎林慮齊云云道函作突圻  
堪埽一作堪陷魍魎卽白澤之傒龍

付畱橋柱像也○水經注馮翊石柱橋北首壘石水中舊有付  
畱神像此神與魯班語曰我貌猙醜卿善圖物容我不出班拱  
手令出頭以腳畫地置其像于水惟背以上大水上董阜後焚



此橋魏夏修之。付畱之像。曹公騎馬見之驚。定州張平子事與此同。三齊略記載始皇巧人以腳畫石塘相見之海神。神怒負約。可知附會。

聾聾皆漸。○張續宣室志曰。裴漸隱伊上。李道士曰。當今制鬼。

無如漸耳。時朝士書聾于門。成式曰。元日書門。息癘辟邪符尾。

勅聾。搜真玉鏡作聾。

積斬二音禪讀你平聲

博物志。漢舊史。讎大挑人葦。

索滄耳。虎等聾蓋滄耳也。

諾皋。太陰神也。○段成式云。唐乘言。諾皋太陰將星神名。有諾

皋記。甲子日神曰弓陰。入水呼之不溺。甲戌神名執明。入火呼之不燒。日名張表。月名文申。雷公江赫冲。電母秀文英。風伯方



道彰雨師陳華夫俱見道經藝苑卮言載之此定臆造其字亦

多造者如曰釐生丙戌日鬼也天陪乙卯也耳述戊午也遘壬戌也迺辛丑也音

地聶左乙酉也天遴丙辰也憇辛卯也髮廷迺酉也挺彊丙午也智謂呼皋

復而應諾故取以爲陰神之名

青女○淮南曰秋三日青女乃出降霜雪高誘曰青腰玉女生

霜雪梁昭明曰青女司寒杜詩飛霜任青女翟公吳詩青女霜

如失黃人日故遲王道俊曰玉曆祥異賦云外國之入貢也若

黃人守日而大

郭禪竈神○見後漢陰就傳無功引之智按其祖陰子方以黃

牟祀竈章懷注竈神名禪字子郭不言姓郭杭州刻本艸作陰



子萬悞矣。元瑞云竈神姓張名單字子郭。夫人字卿忌。一曰竈神名壤子。廣濟曆曰伏龍。莊子竈有髻。

僉囊兩山之間鬼。○如小兒。諸葛恪引去故地卽死。

續而述。○秦文公時獵得獸若彘。二童子曰此名續而述。續而述亦曰二童子名寶鷄。得雄者王。得雌者霸。

巫支祈水神。○岳瀆經言禹導淮獲巫支祈。似猴。李肇曰楚人得古鉄鎖青猴。卽山海之無支奇。陳水南言泗州龜山寺井鎖水母。卽毋支祈。弘治十六七季有水怪曰趕浪。曰神木。殆卽此羽家金永之子。○見歸藏啓筮。淮南作羽嘉。

率一作宰。○直翁引莊山有宰。智謂以率安名而訛。



夔魑猶狂耗鬼惡鬼也。○甘泉賤捎夔魑而扶猶狂魑音虛猶音橘。

犁醜小人國之靈鬼也。○山海經小人國有神人面獸身曰犁醜之尸道函有禹竈道昭載觀觀。

黔羸造化神名。○遠遊曰召黔羸而見之。今爲余先乎平路白澤云陰陽變化之精曰岱委摯虞賤用黔雷。疑羸羸之訛

大沈久湫河神也。○秦惠王祀巫咸久湫亞馳所謂詛楚三文也。久與故通。

苑窳蠶神也。○見漢舊儀婦人寓氏公主凡二人曰公主尊稱之也。



通牙  
語忘敬遺主婦產○柯古曰婦產呼之不害二鬼長三寸三分  
上下身衣

折丹山海經神名○術士呼東風符用之相傳日本有此法梵  
書有真丹徐鍔四六龍持貝葉亟傳摩竭之城象負蓮花遂滿  
真丹之境摩竭魚莊飾門柱也真丹震旦也古聖帝時通荒外  
之事安知折丹非真丹之語存疑

俞兒卽蜚虵○管子言俞兒見者霸御覽引俞而莊子王子敖  
告齊桓以委蛇卽此事博物志澤有委蛇短轂長轅見者霸特  
易其名耳詳見諛語

鳧○無功引山海經女和月母國有人曰鳧按胡文煥百家名



書本作鳧。郭璞音婉。

游光伯強皆厲鬼。○風俗通以游光爲厲鬼名。魏志詢語曰李豐兄弟如游光向不得解。觀此便知。天問伯強大厲鬼也。疑卽伯倚強梁二名爲一。

靈露蜚廉屏翳。宋翬異解。○淮南子季春三月豐隆乃出雷師也。應邵曰雲師。韻會作靈露。水經作封墜。西京雜記雲師曰屏翳。呂覽曰屏翳雨師。蓋雲興卽雨也。古師與帥通轉。乃一字後人分之耳。風俗曰雨師爲玄冥。風伯爲蜚廉卽飛廉。元美引孟婆風姨。河圖書曰大伯下爲雨師。熒惑下爲風伯。遁甲開山圖有宋翬。卽雨師二字。



頊天竺笙。依倚後帝。卑皆廁鬼。○禰俎曰。頊天竺。廁鬼也。一名笙。白澤圖曰。故溷之精曰卑。如女持鏡。呼之使人知媿。又曰。廁精名依倚。異苑曰。廁精曰後帝。陶侃嘗見之。

曰蛟曰夔曰揮曰金累。皆山精也。○枹朴子曰。山精如小女。曰蛟。呼之即不敢犯。一曰超空。又曰山精如鼓。一足曰揮。又衣裘。

帶笑。名曰金累。如龍曰飛龍。玄中記。山精食三蟹。千歲蟾蜍食。

之。白澤圖曰。山精名夔。百歲狼化女曰知火。精曰必方。按即木

精曰樟侯。

即異苑陸敬叔所言之彭侯

水中虫曰賈。

與地下犬名同

金之精曰蒼。如

豚。使人不宜妻。水之精曰罔極象。如小兒。赤色可烹。故門之精名野。如朱儒。見人則拜。呼之宜飲食。故宅之精名揮文。又曰兩。



貴故廢墓之精曰元。如老役夫。又名狼鬼。又有山冕如蛇兩頭。呼之可使取金銀。故道徑之精名忌。呼之不迷。澤鬼曰慶忌。道之精名作噐。故池之精名意。又名髡頓。井之精名觀。按禰俎曰井鬼名瓊故市精曰毛門。室精曰傒龍。堂下被髮曰溝。顧愷啓蒙記曰。玉精曰委。如女青衣。桃戟刺之可得。元中記曰。玉精爲白虎。金精爲車馬。銅精爲僮奴。鉛精爲老婦。柯古載蛇鬼曰側石圭。一名廛。馬鬼名賜。衣服鬼名甚遼。側卽刺。天孫召魂。○博物志曰。援神契云。五岳之神。堅。四瀆之神。仁。太山。天帝孫也。主召人魂。白虎通曰。軫星逐鬼。張星拘魂。東井還魂也。王子季曰。融皋山上有飜魂。卽返魂也。稚川有太乙召魂。



魄丹。卒死三日。折齒內一丸卽活。

雲笈七籤。與龍魚河圖諸神名。皆臆造也。○黃庭內經曰。髮神  
蒼華。字太元。腦神精根。字泥丸。眼神明上。字英元。鼻神王壘。字  
靈堅。耳神空閑。字幽田。舌神通金。字正倫。齒神齔鋒。字羅干。心  
神丹元。字守靈。牙神皓華。字虛成。肝神龍烟。字含明。腎神元冥。  
字育嬰。脾神嘗枉。字魂停。膽神龍曜。字威明。龍魚河圖曰。髮神  
壽長。耳神嬌女。目神珠映。鼻神勇盧。齒神丹朱。夜卧當呼之。藏  
經心。虫名斑駁。七籤曰。司命曰發紐。目神曰虛監。舌神曰始梁。  
九關魂名曰綠道。河圖又曰。泰山圓常龍。衡山丹靈峙。華山浩  
鬱狩。恒山登僊。嵩山壽逸羣。泰山將軍唐臣。衡山將軍朱丹。華



山將鄒尚恒山將莫惠嵩山將石元東海馮修夫人朱隱娥南海視赤夫人翳逸寥西海勾太丘百夫人靈素簡北海禹帳里夫人結連趙汲冢曰蓐收居岍山而太公金匱所言四海之神卽祝融玄冥五帝也注疏引東方靈威仰南方赤熛怒中央含樞紐西方白招矩北方叶光紀典略曰虛主刀名大房勞感主矢名防隍角主弓名曲張作典張者誤張主弩名遠望參主戟名大將戰時細祝之或以五日作赤靈符著心前或丙午月作龍虎三囊符太公又載刀神脫光箭神續長矛神跌蹠河圖曰斧神狂章春秋佐助期云司弓弩神曰推亾水經注云皋通神人能治弓弩類山載鏡神紫珍筆神佩阿佐助期又云麥神福集黍



神俯佞蘭郝。豆神靈趙。姓蔡。無功作靈殖。湧幢小品云善睡之神曰宜祿。

三彭三姑三尸。猶三蟲三毒也。庚申表西殺也。○酉陽雜俎。上尸青姑伐人眼中尸。白姑伐人五臟下尸血姑伐人胃命。凡庚申日三尸言人過。玉函秘典。上尸彭琚。小名阿呵。中尸彭瓊。小名作子。下尸彭璣。小名季細。守尸之鬼曰破射。元科三尸。甲寅遊手剪手爪。甲午遊足翦足甲。藏經言三蟲。兩鼠之類也。楞宗元有罵尸蟲文。皮日休白樂天皆守庚申。許渾詩。年長每勞推甲子。夜長初共守庚申。道士程紫霄曰。任汝三彭說是非。皮白何惑乎。文人滑稽自娛耳。

通雅卷之二十一終



通雅卷之二十二

桐山方以智密之輯著

同里姚文燮經三較訂

官制

仕進

辟舉猶古之興眡也。○宰夫書其能者與其良者以告于上。卿大夫三季則大比。攷其德行道藝而興賢者能者禮賓之。遂大夫大比帥其吏而興眡。鄭司農曰興賢若今舉孝廉興能若今舉茂才也。漢高帝詔其有意稱明德者必身勸爲之駕遣詣相國書行義季。文帝二季舉賢良方正直言極諫者。孝帝建元亦舉丞相綰奏罷之。昭宣元成皆舉賢良直言茂材異等。後漢每



因日食災異或初卽位輒詔舉士而孝弟力田自高祖舉爲三老惠帝舉者復其身高后元季初置孝弟力田二千石者一人文帝十二季以戶口率置三老孝弟力田常員文帝嘗遣存問賜帛元符六季舉獨行君子詣行在所元光元季初令郡國舉孝廉各一人又舉有道至孝延平中舉隱士建初辟士四科一德行二學通三明法四多略公府亦以此辟士光祿四行卽以此第其卽從官也魏州郡皆置中正以選舉劉毅言其弊晉太始舉賢良方正直言又舉異行其秀孝則策試之隋詔以志行修謹清平幹濟二科舉人唐賢良方正直言皆制舉試之中者稱及第貞觀十七季舉孝廉茂才異能開元設直言極諫科其



舉選不由館學者謂之鄉貢。州縣試已至省疏名結款通保。由戶部集闕而關於考功試之。開元寶應貞元皆舉孝弟力田。宋乾德三科亦舉賢良經學吏理。然皆吏部試策論三道。開寶舉孝弟德業。嘉祐舉行寔隆興舉逸民廉吏。世降化薄。辟舉亦屬夤緣。特異亦藏詭僞。瑣闥執簿。猶呼盧耳。所教非所用矣。偃風勉善。自得其真。蘇軾曰。舉孝廉則勇者割股。怯者廬墓。此文人之偏詞。欲造舟而先憂溺人耶。科目里選竝行。而徵聘閒舉。總在君相類物情而鼓舞之。胡瑗分齋教學。安石積驗法。有寔行者乎。周宣幹欲罷三十季科舉。痛其積習也。末世治以例而教學不講。即使破格。徒爲奸資。誠使取士先以文學。但優而不用。



必德行特聞始行辟舉得爲吏如此則士益其修文行兩取庶于資格少差耳

漢有甲乙丙科射策者以應令爲中○蕭望之以射策甲科爲郎注師古曰謂爲難問疑義書于策量爲大小書甲乙之科列而置之不使彰顯有欲射者隨其所取得而釋之以知優劣射之言投射也對策者顯問以政事觀其文辭定高下也匡衡以射策甲科不應令除爲太常掌故褚先生曰數射策不中至九中丙科兒寬以射策爲掌故馬宮翟方進何武王嘉竝以射策甲科爲郎房鳳以射策乙科爲太子掌故召信臣以明經甲科爲郎儒林傳平帝時歲課甲科四十人爲郎中乙科二十人爲



太子舍人丙科四十人補文學掌故。光武時顏氏博士缺。試策第一。拜博士。永元十四年。徐防疏。博士及甲乙策試。宜從其家章句。開五十難以試之。論語不宜射策。詔從防言。李巡以爲博士試甲乙科。爭第高下。更相告言。乃刻石經。爭者用息。順帝陽嘉元年。增甲乙科員。由師古注論之。今嘗以射策爲對策者。非矣。余以爲量爲大小。列而置之。隨人欲射之說。恐未必然。或似今出題試法耳。撫言且言題于几上。令士人以矢投之。此說尤非。

唐有六科二科九科四科。○六典載六科。一曰秀才。二曰明經。三曰進士。四曰明法。五曰書。六曰算。試秀才置進士科。始于隋。



至唐初秀才最高。貞觀中有舉而不第者。坐其州長。由是廢絕。士族趨向。惟明經進士二科。而進士爲尤重。帖經及試雜文。則調露二年。從劉思立之請也。顯慶五年。詔五品以上四科舉人。一德行。二經史。三詞藻。四廉直。肅宗乾元。御宣政殿。試四科舉人。宣宗大中十年。奏見置科目。開元禮三禮三傳三史學究道學明法書算童子等九科。通典曰。明經雖有甲乙丙丁四科。進士有甲乙二科。自叅德以來。明經惟有丁第。進士惟乙科而已。進士試詩賦時務策五道。帖一大經。全通爲甲第。策通四帖。過以上爲乙第。及第綴行通名。詣主司謝。乃敘齒赴期集。又有曲江會題名席。紅綾餅飫。所謂衣骨皆香。李贊皇言。臣祖登第後。



家不置文選。朝廷官須公卿子弟。以少習其業。自熟朝廷事也。當國時奏設科取士。而附黨背公。自爲門生。自今一見有司而止。其期集參謁曲江題名皆罷。其曰別頭試者。唐禮部侍郎親故。移試考功。謂之別頭。貞元十六年高郢奏罷之。變曰帖紙令論一經義爲帖括。

宋乾德置三科。太平興國八科。景德六科。天聖十科。紹興復元祐十科。又定兩科。○乾德二年詔置制舉三科。一曰賢良方正。二曰經學優深。三曰詳閑文理。開寶六年御講武殿覆試進士宋準等。御試舉人自此始。以詩賦取士。自開寶六年。至嘉祐八年。凡三十六舉。興國二年御殿覆試。禮部合格八科舉人。得九



經一人。開寶通禮四人。三禮八十人。三傳五十三人。三史三人。學究四十一人。明法十四人。凡百九十六人。并賜本科及第。其九經五經七人。不合格。亦賜同三傳出身。唐進士每歲三十人。咸亨上元增七八十人。尋亦復故。比興國幾五百人。又未命官而賜綠袍。韓笏。淳化三季加論一道。以三題爲準。又詔律賧依平仄用韻。殿試糊名。祥符四季。晁迥定禮部貢院條制。上發解進士條制。天聖元季定科場條貫。景德復六科。賢良博經才識吏理韜畧邊寄等科也。天聖十科加書判拔萃科。又置高蹈丘園沉淪艸澤茂材異等共十科也。并許白衣舉人。紹興二季以朱勝非請。復元祐十科。乃司馬光所請者。十五季分經賧爲二



科進士賜御詩袍笏聞喜宴自興國二季始。唱名自雍熙二季始。廷賜袍笏自祥符元季始。糊名始淳化。而諸州糊名自明道二季始。易書大子祥符。而諸州易名自景祐四季始。廷試不黜始于嘉祐二季。三歲一舉。始于治平四季。宋經義詞賦更爲廢興。已合爲一。又分爲二。溫公盡變安石法。惟經義取士不變。甚是。紹聖初季。令進士純用經義。而改置宏詞一科于進士登科後。試之。取不過數人。卽今之館選也。元仁宗始從李孟之請。制三歲一開科。八月郡縣鄉試。明季二月會試。中者策之于廷。賜及第出身有差。卽今制也。但彼以蒙古色目爲右。漢人南人爲左。各命題耳。



登名上聞也。○史記周紀王曰維天建殷其登名民三百六十夫亦見周書。隨巢子司馬貞曰登進名賢之人猶言升聞也。如淳引呂氏春秋曰魏文侯勝齊天子賞文侯以上聞。樊噲傳破李由軍賜上聞爵。晉灼曰名通于天子也。

新士新試士也。○王制論秀士升之司徒曰選士升之學曰俊士皆曰造士告於王升之司馬曰進士學記中季考校周禮曰大比此猶之試士也。夏官司士故士注曰故爲士者疏曰新升試士未得正爵者爲新士。

重試曰覆試。○舊說蒼后覆試崔沔第一覆試自此始。唐志高祖詔諸州明經秀才俊士進士縣考試州長重覆歲隨方入貢。



此唐法也。漢左雄議舉士先試之公府。又覆之于端門。張成除此科。黃瓊言覆試之作。將以覆虛實。濫不宜改革。則漢已有覆試事矣。乾德六年。詔舉人有父先食祿者。覆試。紹興。于後省覆試。今童生猶覆試。鏤廳彌封。糊名。謄錄。皆詳于宋。而後因之。吳康齋見搜簡。歎曰。辱士至此。遂出。天順中。李賢薦徵爲春坊。辭歸。豈可以尹蹇齋之吹疵而抹殺哉。

漢有童子郎。唐宋開童子科。○漢左雄奏。汝南謝廉。河南趙建。年十二。能通經。拜童子郎。臧洪十五。拜童子郎。黃琬以公孫拜童子郎。梁天監七年。岑之敬十六。擢高第。除童子奉車郎。唐志。十歲以下。能通一經。及孝經論語。誦文十通者。予官。通七者。與



出身員半千裴耀卿王丘皆擢童子科李泌楊炯則舉神童矣。淳化二季賜秦州童子譚孺卿出身雍熙得楊億咸平得宋綬景德得晏殊仁宗時童子賜出身者十人寶元罷天下舉念書童子高孝時皆有童子求試而受官者今則試秀才例稱童生而已景泰中李東陽六歲召見書龍鳳龜麟字八歲試益稷篇。○打髀毬下第也。○李肇國史補曰進士爲時所尚久矣其都會調之舉場通稱曰秀才投刺曰鄉貢得第謂之前進士互相推敬謂之先輩俱捷爲同季有司爲座主京兆府考而升者爲等第外府不試而貢者曰拔解將試自保曰合保羣居而試曰私試造請權要曰關節激揚聲價曰往還旣捷列名慈



恩寺曰題名會。大宴於曲江亭曰曲江會。籍而入選曰春關。不捷而醉飽曰打盹燥。匿名造謗曰無名子。退而肄業曰夏課。挾藏而入曰書策打鼾。見地理志。卽打盹燥也。

覓舉梯媒。言關節也。○薛登曰。方今舉士詔下。陳篇希恩。奏記誓報。俗號舉人皆稱覓舉。禮部采名。故預投公卷。柳宗元上權德輿溫卷。後周寶儀請進士省卷。納五軸以上。崔郾試士。吳武陵以杜牧阿房賦予之。請以第一人處牧之。錢徽不聽。段文昌李紳託而貶蘇軾。以題致李廌。而爲二章得。可見科場采名。或以關節買舉。自昔然矣。陶九成言關節謂之梯媒。初登第有燒尾宴。大臣獻食亦曰燒尾。○大臣拜官。獻食天子



曰燒尾。蘇瓌獨不進。韋嗣立趙彥照崔湜轉官。中宗皆令于興慶池燒尾。邵氏聞見錄。士人登第。必展歡宴。謂之燒尾。說曰。虎化人。惟尾不化。須得燒去。又曰。新竿入羣。須燒其尾。又曰。魚化龍。必有雷火燒其尾。唐太宗問宋子奢。燒尾事。以燒竿爲對。石林燕語。亦莫能折衷也。筆叢作朱子奢。

淡墨氈書。貢院榜也。○撫言進士榜用黃紙。以淡墨氈書。禮部貢院四字於首。賈公談錄云。李紆侍郎放榜。未填榜首四字。疾命吏士昶。昶善書。時醉。以氈筆染不能加墨。迨明方覺。字體濃淡相間。反致其妍。後遂爲故事。

後漢始有選部。晉有選例。梁有選品。唐有三銓。有小選。東選。南



選乾德參選。雍熙置三班院。元豐定四選。紹興編七司例冊。○  
漢成帝建始初置尚書有常侍曹。主公卿事。又有二千石曹。掌  
郡國二千石。後漢始改爲吏曹。主選舉祠祀。尚書令總之。後又  
爲選部。靈帝以梁鵠爲選部尚書。魏改選部爲吏部。陳蕃爲光  
祿勳。與五官中郎將黃琬共典選舉。疏曰。陛下宜擇從忠善。尺  
一選舉。委尚書三公。呂強疏曰。舊典選舉委三府。三府有選。參  
議掾屬。咨其行狀。若無可察。然後付之尚書。今但任尚書。或復  
敕用。蓋漢時尚書官小也。晉李胤刊定選例而著令。王戎領吏  
部。始爲甲午制。劉宋大明中。分吏部尚書置二人。齊和帝時。梁  
武帝表大選部。天監中。徐勉撰選品。唐六典曰。三銓曰尚書銓。



中銓東銓四事曰身言書判三類曰德才勞凡流外兵部禮部舉人郎官得自主之曰小選太宗時以歲旱穀貴東人選者集于洛州調之東選高宗時以嶺南五管黔中都督府得卽任土人而官或非才乃遣郎官御史爲選補使調之南選吏部員外郎掌選院調之南曹長安志選院在尚書省南選人看榜處乾德二年詔流內銓聽四時參選不俟冬集雍熙四季置三班院供奉官殿直承旨爲三班嘉祐徙三班院于文思院西志曰三班院文臣兩制以上武臣諸司使以上掌之元豐五年吏部分選有四文臣自朝議大夫大理正以下非敕授者歸尚書左選武自皇城使以下非宣授者歸尚書右選自初仕至幕職歸侍



郎左選自監掌至供奉官歸侍郎右選神宗謂三代兩漢無文  
武之別故命蘇頌定之紹興四年詔吏部編七司例冊淳熙修  
七司法紹興十九年上吏部續降七司通用法續降者續降朝  
旨也愚者曰漢襲秦郡縣猶有封建意守令自用其屬而吏皆  
上逢耳目親而試之明故漢最得人自隋奪天下權予吏部責  
一手知天下人才公者執例而已崔銑胡世寧高束陳建之議  
宜寫一通以進

注擬選冊也○山濤每缺啓擬後因大品格注其人才以四事  
三類定其留放謂之注擬唐三品以上冊授五品以上制授六  
品勅授皆由尚書省奏擬



厭唱。選人受注而唱名也。○唐法五品以上不試。上各中書門下。六品以下始集而試。觀其書判。已試而銓。察其身言。已銓而詢。注其便利。已注而唱。下厭者得反通其辭。三唱而不厭。聽冬集。

過官。過門下省也。○故事三銓三注三唱而後擬官。季春始畢。乃過門下省。猶今之過堂也。楊國忠兼吏部尚書。密定員閣。於都堂試唱。于是門下過官三銓。注官之制皆廢。奏受具題也。○厭者爲申上于僕射。乃上尚書。有給事中讀之。黃門侍郎省之。侍中審之。然後以聞。主者受旨而奉行焉。謂之奏受。按今文選。單月急選。雙月大選。掣籤于棕棚。具本日題。其私情或陳諫。則



曰奏。奏本長題本一寸。吏部掣籤選官。始于太宰關中。孫公丕揚後遂踵之。

凡拜官則給告身。○唐制拜官之日。卽給告身。其人先輸朱膠綾紬價。方准書給。大將軍告身一通。止易一醉。此猶今之空頭劄也。唐選舉志曰。三銓注擬奏受。視品及流外則補。皆給以符。謂之告身。此似今之文憑。干文定謂告身卽今之告勅也。宋之制亦然。每至宣麻誕告。鎖院演綸。詞頭以下。外人未知其密且重如此。

漢有課第。有功次。魏有都官考課法。晉有九班制。元魏有勲書。唐有考簿。宋有磨勘。○漢選部猶周官司士也。三歲稽士任。而



進退其爵祿猶後世之考功也。漢御史中丞總領州郡奏事課第諸刺史。刺史課郡國二千石。郡又課縣。兩府九卿雜攷郡國之計。天子受相國之要。光祿第郎從官。孝元使尚書選第中二千石。選第猶課第也。課其殿最也。其曰連最連稱最也。功次計功幾次也。兒寬爲掌故功次補廷尉文學卒史。馮奉世爲郎功次補菑安長。薛恭本縣孝者功次稍遷。衛綰爲郎功次遷中郎將是也。尤異最尤異也。魏明帝詔散騎常侍劉邵作都官考課七十二條。晉九班制。劉頌爲吏部尚書所建。杜預受詔爲黜陟之課。略曰末世疑心而信耳目。疑耳目而信簡書。漢刺史歲終奏事。不制算課。而清濁粗舉。魏氏考課卽京房遺意。失于苛細。



以遺大體。故歷代莫能通也。詔書以考課難成。聽通荐例。卒不行矣。元魏朝堂黜陟。郭祚奏景明考格。盧同爲左相。閤吏部勲書。檢覈竊階者三百餘人。唐考功差以九等。敘以四善。外有二十七最。貞觀歲定京官望高者二人。分校京外官考。給事中中書舍人各一人蒞之。考功郎中判京官。員外判外官考。故事考簿朱墨。咸通王徽建議以墨。其六條黜陟。則遣使行也。唐虞九載。魏晉以後六周。唐因隋爲四。又減爲三考。宋以三季爲滿。四朝志曰。考功以七事考監司。以四善三最考守令。淳化四季。以考校京朝官爲審官院。幕職州縣官爲考課院。旋以考課院歸流內銓。祥符九季磨勘京朝官。天禧詔審秩及三季審官院磨



通考  
卷之二十二  
一  
勘嘉祐有考績新書。磨勘以中丞學士典領。紹興舉荐按察四條。沈該劾司馬光所請也。

季勞。遷敘也。○唐志凡居官必四考。四考中中。進季勞一階敘。凡季勞歲一敘。給記階牒。宋太月限。考滿卽遷。卽季勞也。

書考。自書其課迹也。○宋太宗罷歲月序遷之制。欲修唐制書考之事。興國六年。詔京朝官釐務于外者。咸給御前印紙。令書治迹。雍熙四年。知州通判給御前印紙。書課績。

曰流內者。自隋始。曰流外者。自唐始。○隋置九品。品各有從。自四品以下。每品分爲上下。凡三十階。自太師始焉。謂之流內。流內自此始。又置視正一品至九品。品各有從。自行臺尚書令始。



焉。謂之視流內。自此始。唐因隋制。又置視正五品。視從七品。以除薩寶及符祓正。謂之視流內。又置勳品九品。自諸衛錄事。及五省令史始焉。謂之流外。自此始。劉祥道言。歲入流千四百人。欲歲定爲五百人。魏元同言。諸色入流。歲以千計。曰流外者。猶今言未入流也。

假版。班品之卑者。○陸機表注。凡王封拜。謂之版官。卽漢尺一版。拜用之遺也。隋官志曰。陳有版咨議參軍。版長史之類。晉華譚傳。謹奉還所假左丞相軍咨祭酒版。晁錯言。里有假士。連有假五百。五百師名也。邑有假候。後志有軍假司馬。趙充國從貳師。班超從竇固。皆假司馬。似今之劄付官。晉大行臺之時。所任



承制拜封皆假官也。

官京師曰京官。常參曰升朝官。○京朝官蓋有分別。陸務觀曰。唐自相輔以下皆曰京官。常朝曰常參官。宋初以常參預朝謁曰升朝官。元豐以預宴坐曰升朝官。合之則曰京朝官。

抹階。辭免除授之故事也。○學士院辭免除授。賜詔皆留其章。葉石林曰。今降批表。院中用紙連其章。後書省表具之字。必長作表字。傍一瞥通其章。階伏上。謂之抹階。使不復用舊銜意。

以他官兼曰貼職。○史館昭文館集賢院爲三館。皆寓崇文院。直館直院謂之館職。以它官兼者謂之貼職。劉禹錫集荆門縣記云。禹錫方以郎佐帖職于計臺。帖職字當始此。元吏房三科。



三日貼黃。今奏本約其事曰貼黃。而清黃則兩選核黃封也。

官制

爵祿

漢賜民爵。唐曰賜民古爵。宋賜高季爵。○大事記。晉賜天下民爵。自惠帝始。後漢書注。劉邵爵制曰。春秋不更庶長已見。商鞅修其法。品爲十八級。合關內侯凡二十等。百官表曰。爵一級曰公士。二上造。三簪褭。四不更。五大夫。六官大夫。七公大夫。八公乘。九五大夫。十左庶長。十一右庶長。十二左更。十三中更。十四右更。十五少上造。十六大上造。十七車庶長。十八大庶長。十九關內侯。二十徹侯。避孝諱曰通侯。賜爵自公士以上。不得過公乘。賜爵者有罪得贖。貧者得賣與人。高紀詔曰。民各歸其縣。復



故爵又曰七大夫公乘以上皆高爵也。異日秦民爵公大夫以上令丞與抗禮。今吾于爵非輕也。其令諸吏善遇高爵。于文定言漢賜民爵不知其制。智按唐劉知幾所陳海內具僚九品上每歲賜赦必賜勛階至于會宴緋服多于青衣象版多于木笏可見其濫。蓋庶官晉加階級而不及平民與漢異。宋遇郊赦皆賜恩階所及雖多而時頗希闊與唐亦異。于文定言唐宋無賜民爵事殆未考耳。智按唐高宗紀乾封元年封禪改元中宗神龍元年季祀明堂大赦玄宗天寶八載謁太清宮大赦德宗大曆十四年即位大赦皆賜民古爵。宋端拱元年季賜高年百二十人爵爲公士開寶中澶密等州民年八十以上賜爵公士咸平五



季賜京城父老百十九歲祝道品爵公士祥符三季賜祥符等縣季八十以上者爵公士祥符二季以天書降賜爵王伯厚曰秦漢以後不復賜民爵自藉田禮成端拱詔始復賜焉智按魏文帝黃初元季賜天下男子爵人一級三季太皇后賜爵二級明帝太和元季賜天下男子爵人二級青龍元季亦然則魏猶踵故事也文定所言漢賜民爵不知其制智亦疑之疑天下民盡賜爵太社稷卽位皇太子改元恩詔重複則幾無百姓矣常見漢詔賜高季帛又因宋賜民爵必以高季乃始較然于漢詔所稱民殆鄉老或里長之謂乎猶今之耆民壽官也其公乘以下觀高帝詔令諸吏善遇高爵則公士等猶夫民耳卽漢詔所



云久太吏前曾不爲沒也。特用以贖罪而已。惠元季民有罪得賣爵三十級以免死罪。應邵曰一級值錢二千。凡爲六萬。若今贖罪入三十疋縑矣。六季令民得賣爵入粟拜爵。晁錯之議也。六石爲上進。稍增至四千石爲五大夫。各以多少級數爲差。景帝時修賣爵令。裁其賈以招民。孝帝置老功爵。食貨志曰級十七萬。凡直三十餘萬金。是何其貴也。又何不分上下之等。豈造士與軍衛同價乎。劉氏曰級爲十七衍萬字也。臣瓚曰茂陵中書有老功爵一級曰造士。二曰閑輿衛。三曰良士。四曰元戎士。五官首。六秉鐸。七千夫。八樂鄉。九執戎。十政戾庶長。十一軍衛。則止十一級。楊僕傳以千夫爲吏。功臣表陸量侯須無曾孫秉。



鐸聖灌嬰曾孫官首匿皆功爵也。魏志建安二十季始置名號侯爵十八級。關中侯十七級皆金印紫綬。置關內外侯十八級。銅印龜紐墨綬。五大夫十五級。銅印環紐墨綬。皆不食租。與舊列侯關內侯凡六等。以賞軍功。裴松之以爲今之虛封。蓋自此始。爵曰不更。言不更卒也。後左右中更。言用更卒也。簪褭舊注。御駟馬者。要褭。古之名馬也。駕駟馬者。其形似簪。智不謂然。蓋導加冠曰簪。以組帶馬曰褭也。考洪武時曾賜民爵里士鄉士。

周五等。漢用其二。魏凡六等。晉五等。唐九等。宋五等。明用三等。○漢二等爵。魏咸熙元年建五等爵。晉大五等。有大國次國小



國郡公郡侯自魏黃初三季制封王之庶子爲卿公嗣王之庶子爲縣侯公侯之庶子爲亭伯晉泰始二季詔曰本爲縣侯者傳封次子爲亭侯爲卿侯爲關內侯皆食本戶十分之一唐百官志司封凡爵九等一曰王食邑萬戶正一品二曰嗣王郡王五千戶從一三曰國公三千戶正二四曰開國郡公三千石從二五曰開國縣公千五百戶正三六曰開國縣侯千戶從三七曰開國縣伯七百戶正四八曰開國縣子五百戶正五九曰開國縣男三百戶從五通典并云其上加實封者仍給租庸凡封戶三丁以上爲率歲租三之一入朝廷食實封者得真戶分食開元勅諸食寔封並以三丁爲限開元十季詔宰相共食實封



三百戶以七丁爲限。堂封自此始。將帥封王。自天寶九載始。宋用五等。以勲階進。明朝封爵止。公侯伯三等。而位俱在一品之上。異姓王。但有追封而已。

景風紹封以夏封也。○和紀永元詔。曹相國後容城侯無嗣。求近親宜爲嗣者。須景風紹封。以章厥功。注春秋考異郵曰。夏至四十五日。景風至。則封有功三王世家。因盛夏吉時。定皇太子位。月令大夏之日。封諸侯。下邳惠王衍傳注。和帝賜彭城王恭詔。差次下邳諸子上名。將及景風。拜授印綬。馮異傳。安帝詔二十八將絕世者。分別署狀。上將及景風。章敘舊德。盧植規竇武曰。准之前事。將有景風之祚。



餐錢月奉也。○高后紀列侯幸得賜餐錢奉邑。注餐錢賜厨膳錢也。奉邑本所食邑也。周禮太宰注祿若今月奉。疏曰古者祿皆月別給之。漢之月奉亦月給之。古制祿不計錢。陸贄曰三代以食人衆寡爲差。兩漢以石數多少爲秩。史記樊噲自三百石吏以上而効之以石計祿。始見于此。後百官志百官受奉例大將軍三公奉月三百五十斛。遞減至佐史月八斛。凡諸受奉半錢半穀。外戚傳倅華秩視真二千石。汲黯傳以諸侯相秩居淮陽。注如淳曰律真二千石月百五十斛。歲得千八百石。是石與斛之數無殊。石卽斛也。然則量數百五十斛以名祿則曰千八百石猶有古制。祿不計錢之遺意。晉有官表注曰漢延平中中



二千石奉錢九千米七十二斛。真二千石月錢六千五百米三十六斛。則漢百官俸米多錢少。于此可見其數減于前漢者。後漢裁之也。古時大臣祿賜甚厚。既有國土而賜予動千萬。如黃金百斤。其常也。開元二十四年定百官俸。一品月三十千。遞至九品月一千九百餘。大曆十二年加京官俸。三公宰相每月各一百二十貫。又有職分田。一品歲七百石。自會昌以後三師二百萬。三公一百六十萬。侍中百五十萬。令僕百四十萬。尚書御史大夫一百萬。節度使三十萬。此計一歲而言也。一萬當爲十緡。二百萬則爲二千緡矣。宋乾德置俸戶。祥符五年加職官月俸。三公百二十貫。此與大曆相近。北漢劉崇以太原建國。



宰相月俸百緡。乃今一統宰相月俸猶不能半。鄭端簡曰。祿涼于宋。而蠲復之恩科愈厚。至推三代一如見爵。則千古曠絕之恩矣。宋元封贈大父母。降父母一等。封贈父母。降本身一等。斗食祿少也。○通典斗食太常明堂員吏。至雒陽令員吏。月十一斛。斗食差優於佐史。佐史月八斛。秦范睢曰。自斗食以上。有非相國之人者乎。王翦歸斗食以下秩。薛宣傳爲大司農斗食屬。師古曰。斗食一歲不滿百石。

寄祿官猶今之勳階也。○夢得曰。制寄祿官。銀青光祿大夫與光祿正議中散朝議皆分左右。朝議中散有出身人皆超右。其餘竝以序遷。宋太祖階級法曰。一階一級。全歸伏事之儀。續演



繁露曰政和三季勅特進至承務郎爲寄祿官承直郎至迪功郎爲階官蓋元豐時未分寄祿與階官故人以非職官爲階官近制則以特進正尹少尹爲勛以大夫郎爲階而無寄祿例

霍料幕府官俸也○松陵唱和皮日休云酒坊吏到常先見霍料符來每探支注云吳都有霍料宋景文祁筆記不知鶴料王洙李淑皆不知按墨莊漫錄曰曾文彥知滁州有和表弟西齋詩寧羨一囊供霍料會看千里躍龍媒注云唐幕府官俸謂之霍料



...

...

...

...

...

...

...

...

...

...



通雅卷之二十三

桐山方以智密之輯著

同里姚文燮經三較訂

官制 文職

三名公卿大夫也○周禮疏引易通卦驗云天地成位君臣道  
生君有五期輔有三名注公卿大夫也政教君臣起自人皇之  
世至伏羲因之故文耀鉤曰伏羲作易名官者也

黃帝有五官九工少皞五正唐虞有六官九官○史記黃帝建  
大五行于是有天地神祇物類之官是謂五官管子呂覽皆言  
黃帝五官以正人佐文選王融策文九工開于黃序注黃帝也



雲官有五人。有同德四人。合爲九。少皞五正。見于蔡墨之說。五行正也。通典堯置天地四時之官爲六卿。舜爲六官以正天地。四時。說苑曰。堯時舜爲司徒。契爲司馬。禹爲司空。稷爲田疇。夔爲樂正。倕爲工師。伯夷爲秩宗。皋陶爲大理。益掌飭禽。爲九職。劉向傳舜命九官。濟濟相讓。注禹司空。棄后稷。契司徒。咎繇士。垂共工。益虞。伯夷秩宗。夔典樂。龍納言。周禮疏曰。堯舜官號稍改。其時官名。蓋曰稷曰司徒。是天官。稷也。地官司徒也。又云。命羲和仲叔。使分主四方。注仲叔亦羲和之子。堯旣分陰陽四時。又命四子爲之官。掌四時者。字曰仲叔。則掌天地者。其曰伯乎。是有六官。分命仲叔。注云。官名。蓋春爲秩宗。夏爲司馬。秋爲士。



冬爲共工通稷與司徒是六官之名鄭玄分陰陽爲四時者分  
高辛時重黎之天地官使兼主四時耳共工注水官也堯天官  
爲稷又司徒士此三官是堯時事舜述前功秩宗舜時官也惟  
無夏官之名夏傳曰司馬在萌則羲叔爲夏官是司馬也鄭玄  
曰初堯冬官爲共工舜舉禹治水堯知其必成功故改命司空  
以官名罷異之非常官也禹登百揆之任捨司空之職爲共工  
與虞垂益是也始羲和之時主四岳者謂之四伯後分至八伯  
堯初天官爲稷至試舜謂之百揆舜命禹爲之卽天官也崔靈  
恩曰舜改地官爲司徒秋官爲士冬官爲司空春官秩宗  
五官配五行也○自黃帝建太五行少昊五鳩氏顓頊太五行



之官。唐虞百揆四岳。象天之有五行也。孔穎達周官疏曰。百揆一人。四岳內典四時之政。四人也。孔平仲則謂四岳爲一官。俱是縣擬。曲禮曰。天子建天官。先六大。次五官。注此蓋殷時制。呂氏曰。殷人尊神。卽堯命羲和。舜齊七政。洪範首五行之意也。其實唐三代皆有六官。皆有九卿。考工記疏六官之記可見者。堯育重黎之後。羲和及其和叔四子。掌天地四時。夏書乃召六卿。商周稍改職名。六官之數則同。通典曰。夏制九卿。殷因亦如之。三少六官也。智嘗論六宗之名。與二賢之說。以爲凡數五卽有六。五爲生數之終。六爲成數之始。從一至十。五六固天地之中數也。如五禮卽有六樂。五音卽有六律。五運卽有六氣。皆自然。



之理東曰青龍南曰朱雀西曰白虎北曰玄武玄武者龜與蛇也木曰勾芒火曰祝融土曰后土金曰蓐收水曰玄冥玄冥則少皞之二子曰修曰熙也人身一心一肺一肝一脾而腎有二六宮貴神則土有二六氣則火有二蓋土爲終水爲始而水火相交水土相成也龍馬言曰六官之名冢大也宰制也司徒徒眾也宗伯禮以宗爲先司馬兵以馬爲先司寇寇所常防治也司空之空爲何物乎堯制司空之官以寵禹卽宰相也漢三公以司空配之猶古意也商以太宰爲前列周并列而重其權蓋冢宰兼相職而司空寔相佐也以五行言之地官爲土天一生水則天與水猶一水也然則司空篇亡非亡也本無職掌以宰



相時兼之耳。此說甚奇。故存之以備論。

漢有官簿有儀品。魏晉有品令。唐有格令。宋有班簿有具員。○  
安帝詔舉刺史長令相清白。敕身率下者。無拘官簿。注謂不拘  
常牒也。後百官志曰。班固著百官表。職分未悉。故依其官簿。粗  
注職分。以爲百官志。注曰。百官簿。劉昭補志序所云。百官就乎  
故簿是也。應邵有漢官儀。隋志王隆作漢官解詁。胡廣注樊長  
孫與劉千秋書曰。張平子次述漢事。莫能太。顧見汲令王文山  
小學漢官篇。足知舊制儀品。荀攸撰魏官儀。徐宣瑜晉官品。晉  
志又載魏晉官品令。後魏志曰。晉品令有正。無從。唐開元刊定  
職次。著爲格令。宋開寶詔除授京官。依朝官例降勅。御史臺班



簿十日一上中書太宗閱班簿擇近臣舉官慶曆中中丞張方平言臣在翰林見天聖中具員元豐六年李清臣爲備選具員十冊此如今之御覽冊也按表少府若盧注引漢品令則漢先有品令之書矣唐寔錄宣宗命宰相作具員御覽

中臺尚書省東臺門下省西臺中書省也○中臺亦稱都臺始于漢成置尚書至後漢而權重唐龍朔改曰中臺都堂居中左右分司都堂東有吏戶禮部三行西有兵刑工部三行每行四司凡二十四司中書舊有其官魏晉始謂之中書省北魏曰西臺龍朔亦然光宅曰鳳閣開元曰紫薇自黃初置監晉因之又置舍人齊通事舍人四員各住一省曰四戶權傾天下晉孝武



來常居內殿以省官一人司詔誥。佗在西省。因曰西省郎。唐中書舍人爲文士之極任。門下省。後漢謂之侍中寺。晉志曰給事黃門侍郎郎中俱管門下眾務。龍朔改曰東臺。光宅曰鸞臺。開元曰黃門省。給事中加官也。隋置吏部給事郎。煬帝移爲門下之職。又有七諫議屬門下。煬帝廢之。唐高祖復置四人。貞觀于門下省置起居郎二人卽起居注也。相沿皆謂之三省。曰臺者別稱也。謝靈運晉書曰漢尚書爲中臺御史爲憲臺謁者爲外臺曰三臺。蔡邕以侍御史轉持書御史遷尚書三日之間周歷三臺。其曰八座者六典曰後漢以令僕射六曹尚書爲八座。今以二丞相六尚書爲八座。唐不置令也。宋齊有三臺五省謂尚



書中書門下秘書集書省。元豐制門下中書增建後省置諫官。筆塵曰。霍山錄尚書有上書言其罪者。山屏不奏其書。後上書者盡奏封事。輒使中書令出取。不關尚書。可見尚書是士人。中書則宦官也。及江左至唐。乃以中書尚書列爲兩省。中書傳命。尚書受而行之。則尚書外庭吏也。唐之設翰林學士于禁中。專掌制命。而中書亦少疎矣。及元設中書省。而以尚書隸之。則中書外廷臣也。今之內閣。則漢之尚書令。唐之中書省。而司禮中官。則漢之中書令也。漢制大將軍佐三公下。及竇憲伐北國還。佐次太傅。在三公之上。自是東漢官制太傅第一。太將軍次之。太尉次之。司徒故丞相也。又次之。司空故御史大夫也。又次之。



西漢有三府。丞相御史大夫大將軍也。其後增二將軍。謂之五府。東漢有五府。太傅太尉司徒司空大將軍也。西漢所謂三公者。丞相太尉御史大夫而已。其後以大將軍代太尉。而以大司馬號冠之。然猶一官耳。東漢承元成之舊。以司徒代丞相。司空代御史大夫。司馬代太尉。爲三公。而大將軍佐三公之上。與司馬爲二官矣。曹操爲丞相。佐三公上。而丞相與司徒亦爲二官矣。東漢之末。以太傅總百揆。爲首相。太尉次之。司徒次之。司空次之。而大將軍號。或在太傅之下。太尉之上。有五公矣。晉初以太師太保司徒司空爲文官公。而以左右光祿大夫開府者爲從公。大司馬大將軍太尉爲武臣公。而以驃騎車騎開府者爲



從公有八公矣。已而齊王冏之徒，又自爲丞相，不在八公之數。則又冗矣。智按江左自劉宋以後，宰相無常員，惟人主所與議論政事，委以機務者，不論銜之大小，皆真相也。陳後政事并由中書，有舍人五人，分掌二十一局，各當尚書諸曹，竝爲上司。尚書聽受而已。荀勗以爲鳳凰池，卽其端矣。此中書之重也。北朝惟重門下，三公尚書非帶侍中銜，不得聞政。此門下之重也。唐則竝重已而遞重已，而重中書云。

內錄錄尚書事也。○桓溫固讓內錄是也。人稱會稽王道子爲東錄，世子元顯爲西錄，東第可設雀羅，言朝在西，元顯執權也。今詹府有錄事小官也。然亦因其名。孔叢子：桓子新論皆以大



麓爲大錄。

晉以後之侍中乃宰相。非秦漢之侍中也。○秦侍中本丞相史也。五人徃來殿內東箱奏事。謂之侍中。漢爲加官。分掌乘輿服物。孝帝以孔安國儒者。掌御唾壺。朝廷榮之。表曰侍中。左右曹諸史散騎中常侍皆加官。侍中中常侍得入禁中。諸曹受尚書事。諸史得舉法。散騎騎竝乘輿車。給事中亦加官。志曰屬少府。比二千石。周禮太僕千寶注曰若漢侍中。西漢侍中有嚴朱東方。吾丘蘇。歐陽地餘。王商師丹諸人。班穉爲黃門郎中常侍。朱穆曰中常侍故事參選士人。建武以後悉用宦者矣。晉志曰黃帝時風后爲侍中。周爲常伯之任。秦漢無定員。後漢曰侍中



寺卽門下省也。冠蒼弁大冠加金璫附蟬爲文貂尾爲飾。三省旣立則侍中爲門下省之長官給事黃門侍郎散騎常侍俱屬門下。稱曰黃散。唐初因隋爲納言。後屢更改總之自晉以後門下省長官卽宰相也。

漢有丞相府。唐宋有政事堂。非今之東閣也。○鄧通詣丞相府。鵬雀飛丞相府是也。唐志曰三省長官議事于門下省政事堂。後裴炎自侍中遷中書令乃徙政事堂于中書省。開元十一季張說爲相又改政事堂號中書門下。列五房于後。神宗史志中書門下在朝堂西。榜曰中書。爲宰相政事之所。又有中書省。門下省者。存其名。列皇城外。中書省但掌冊文覆奏考帳。門下省



主乘輿八寶朝會。佗版流外考校而已。中書令侍中不任職。元豐官制行。悉釐正之。乃廢中書門下省之在皇城外者。併朝堂西之中書堂爲門下中書兩省。以左右僕射兼門下中書侍郎。又以兩侍郎副之。神宗曰。中書省揆而議之。門下省審而覆之。尚書省承而行之。哲宗太。呂公著言。唐太宗以三省長官共議從之。建炎三季始合三省爲一。按今之東閣則學士之房耳。故無文移可行。

太府。漢丞相府也。○以張湯甯成掾。以湯爲無害。言大府調茂陵尉。注師古曰。大府丞相府也。趙禹爲丞相史。周亞夫曰。文深不可以居大府。蔡質漢儀曰。司徒府與蒼龍闕對。厭于尊者。不



敢號府。應邵曰不然。丞相舊在長安時。府有四出門。隨時聽事。明帝欲依之。迫于太尉司空。但爲東西門耳。荀綽晉官表注曰。漢丞相府門無闌。不設鈴。不警鼓。深大廣遠。無節限也。

唐宋政事堂皆在朝堂之西。○唐門下省爲政事堂。裴炎移入中書省。政事堂有北門。過中書舍人院咨訪。至常袞乃塞之。李華有中書政事堂記。言裴炎之非。李庾賸曰。西則月華重啓。銀臺內向。中書在焉。周密宰相舊記。廣德二年。令射生自光範門送郭子儀。注大明宮含元殿西爲光範門。韓愈上宰相書。伏光範門外。是可推也。宋官志曰。中書在朝堂西。是爲政事堂。宋中書門下并列于外。又別置中書于禁中。爲政事堂。與樞密院對。



掌大政。乾德二年置參知止令。就宣徽廳上事。

宰相有平章參知同三品之名。唐也。○尚書令侍中中書令爲宰相。不輕授人。常以他官假以他名。貞觀八年李靖辭位。三兩日一至中書門下平章事。平章事起此。蕭瑀以太子太保李勣以詹事同中書門下三品同三品起此。然二品不專用。高宗以後爲相者必加同三品。而張文瓘以東臺侍郎同東西臺三品同三品入銜。自文瓘始。永淳元年以郭待舉等同承受進止平章事。平章事入銜。自待舉等始。通典曰侍中中書令爲真相。尚書令則太宗曾爲之。郭子儀懇辭是也。其以他官參掌者。但加同三品及平章事。知政事參知機務參與政事之名。并爲宰相。



卽漢韓安國張湯爲御史大夫行丞相事之例也。蓋高宗以郭待舉岑長倩郭一正魏玄同爲相。以其資任尚淺。未可與諸相同名。且令預政事。與中書門下同受進止。平章事。此時雖不設尚書令。而左右僕射卽爲真相。同三品者次之。同平章事又次之。至宋時遂以同平章事爲正相。而以參知政事爲次相。然則宋之參知政事卽唐同平章也。元以丞相居平章事之上。則猶唐始太平章之意也。宋之丞相卽參政也。元乃以參政居左右丞之下。

中書樞密。宋之兩府。然考漢唐之始名。皆宦官也。○漢之中書令。本宦官也。至江左而爲宰相。唐之樞密使。本宦官也。至五代



時以樞密使爲內輔臣。宰相爲外輔臣。而樞密之權重于宰相。如宰相兼樞密。則得專大政。如罷樞密之權。但爲宰相。其任反輕。亦如唐之左右僕射也。蓋郭崇韜之于莊宗。安重誨之于明宗。然皆以佐命元功。入爲樞密。刑賞黜陟。無不由之。其勢然也。後晉太祖懲其橫肆。遂廢樞密。以印付中書。而宰相之任始專矣。唐初樞密之設。蓋于政事堂後列五房。有樞密房。設以主曹務。乃宰相文書之所也。宣宗以後。始設東西樞密兩院。以宦者爲使。而樞密之任歸之。其權與宰相等矣。唐莊宗卽位。以豆盧革盧程同平章事。郭崇韜張居翰爲樞密使。始以外官爲之。而樞密之任。親于宰相。以其與聞宥密也。有宋建國。因五代之舊。



以中書爲相。樞密爲將。謂之兩府。而宰相之權重于樞密矣。唐末兩樞密使及左右中尉。柄事禁中。與宰相表裡。號爲中貴。亦稱內大臣。樞密卽今之司禮。中尉卽今之東廠也。唐金吾衛屬南衙。卽今之錦衣。羽林衛屬北衙。卽今之東廠。李輔國欲選羽林騎士五百。以備巡邏。蓋欲以北牙禁旅。侵南牙之職。故宰相李揆急奏止之。輔國又署察士數十人。潛令于人間聽察細事。有所追索。諸司無敢拒者。貞朝恩專權。亦于北軍置獄。使坊市惡少。率羅告富室。沒其家資。則成化崇禎閒之西廠矣。

儀同三司。同三公之三司也。○東漢太尉司徒司空。謂之三司。鄧騭爲車騎將軍。儀同三司。自是南北因之。有儀同三司之名。



矣。唐又以鹽鐵度支戶部爲三司。天祐三季，以朱全忠爲鹽鐵度支戶部三司都制置，其名始于此。三司使名始於後唐張延朗。玄宗時楊國忠至，兼領數十使，然未立此名也。唐志凡寃而無告者，三司詰之。此謂御史大夫中書門下爲三司，太子監國則詹事庶子爲三司。

古小而今大者，尚書侍郎也。古大而今小者，檢校提舉也。○漢成置尚書官小，侍郎則郎中滿三歲者，後權日重，遂爲公卿。晉有檢校御史，唐嘗加檢校尚書。宋治平二季，中丞賈黯請皇子及宗室卑屬除檢校三師官。熙寧遣使提領轉運，有提舉常平司。又署都大提舉麟臺故事，舊有提舉官。政和七季，置提舉秘



書省。又有提舉太史局。又有提舉宮觀之名。今則檢校提舉。皆爲小職。僕射秦官。其職最小。後漸爲宰相。漢有司隸校尉。城門校尉。八校尉。戊巳校尉。而今爲錦衣衛之班役。

今之省中。專指給事。古之六部郎。皆省中也。○給諫原屬門下省。今六科封駁。猶其遺也。尚書省向謂之中臺。劉宋設在建禮門內。曰內臺。北齊曰都省。曰北省。唐神龍定爲尚書省。都堂居中。左右分司。都堂之東有吏戶禮部。西有兵刑工部。故稱吏部曰東曹。兵部曰西曹。通典曰吏兵部爲前行。戶刑爲中行。禮工爲後行。給事本加官。劉向爲郎中。給事黃門。六百石秩。孔放李息卓茂皆爲之。所謂暮對青鎖門拜之夕郎也。



漢之諸郎非盡尚書郎也。○漢官云尚書郎初從三署郎選詣尚書臺試每一郎缺則試五人先試箋奏初入臺稱尚書郎中滿歲稱尚書郎三歲稱侍郎田蚡少爲諸曹郎是尚書郎馮唐爲郎中署長直不疑盜同舍郎金顏驄爲郎楊雄爲侍郎及諸言以貲爲郎父任爲郎皆三署郎也曰外郎者散郎也中郎者省中郎也呂氏曰三署五官左右也續志議郎六百石以文屬光祿勳通典曰尚書郎西漢置四人光武分六曹并左右丞爲三十六人更直五日于建禮門內入直官供青縑白綾被或以錦綉爲之奏事明光殿含雞舌香與黃門侍郎對揖侍郎稱已聞乃出丞郎月賜赤管大筆隃糜墨固已寵矣



依烏郎府也。○晉志郎位十五星在太微帝座東北。一曰依烏郎府也。周之元士。漢官之光祿中散諫議議郎郎中。是其職也。後人解依烏。謂爲後戾。樂府射烏辭。言明帝東巡。有烏鳴乘輿。虎賁郎射中之。遂令亭壁皆画烏。此附會也。漢書作哀烏。古時哀有依音。詳見天文。

五花六押。非今之舍人也。○唐故事中書有軍國政事。則中書舍人各執所見。襍署其名。謂之五花判事。李泌曰。給舍分司押事。故事。舍人謂之六押。蓋晉以後之舍人。卽漢尚書郎。魏置中書通事舍人。梁去通事字。隋改內史舍人。唐武德改中書舍人。又稱西臺鳳閣紫薇舍人。元豐官制行。遂以中書舍人判後省之



事。今則內閣舍人爲宰相承行。與兩殿舍人皆非正途。惟中書科之舍人。准考選。然非昔之任矣。

唐以舍人。年久者爲閣老。非今所稱閣老也。○故事。舍人年久者。呼爲閣老。宰相相呼爲堂老。胡邦衡除龍圖閣學士。周益公賀詩。有龍圖僂爲黃閣老之句。

學士古史之遺。而任遇殊矣。○周官有左右史。蓋今起居之本。漢或有禁中起居注。後漢馬后撰明帝起居注。則起居似女史之任。其後則近侍之臣記錄也。歷代有其職而無其官。後魏始置起居令。學士重于唐。而亦昉于後魏。文帝招文儒之士。置崇文館。貞觀中崇文館有學士。直學士。員不常置也。蓋自漢制侍



中爲侍從之選出入禁闥掌直承明潤色典誥謀議政事已聯  
近矣而禮遇猶未尊嚴也魏改秘書令爲中書令監等官掌贊  
誥命記會時事典作文書而晉之舍人擬爲鳳池可謂權要然  
所司猶冗也至有翰林則爲樞機宥密之地而紫是官者清華  
極矣唐初設弘文館中宗用上官昭容之言置學士四人象四  
時直學士八人象八節學士十二人象十二時遊幸禁苑無不  
畢從大學士之名起此至宋時卽以爲宰相兼其官矣蕭梁有  
壽光殿學士之號殿學之名始此筆塵曰李肇翰林志曰唐翰  
林院在銀臺門內開元二十六季別建學士院德宗移于金鑾  
坡會要曰翰林院在銀臺門內麟德殿西廂重廊之後學士院



在禁中。凡十廳。南廳五間。北廳五間。中隔花甃。承旨居北廳第一間。其任最重。第三間曰槐廳。相傳居此必相。中書門下二省皆供奉外官。隨朝士入見。謂之內供奉。隨翰林院班者。謂之翰林供奉。卽今之兩殿兩房。皆翰林供奉之遺法也。唐自中宗以後。學士之權重于宰相。如陸贄之在奉天。鄭絪之在貞元。裴洎。李絳在元和之初。皆以帷幄密謀。沒軍國大計。用入行政。惟所獻替。及其爲相。寵遇反不若焉。卽有所建白。視在北門。亦若少減地之親疎不同也。漢所謂不任三公。政歸臺閣如此。元大德七年。郭守敬以先朝舊德。累請謝事不許。自是凡翰林太史官不得致仕。遂著爲令。彼所謂画林者。兼有書画供設之流。所謂



太史者。卽今之欽天監官。非詞林也。今之詞林。則兼古之宮僚。禮官中書秘書學士舍人著作郎起居郎螭頭珥筆之任矣。宰相以本學士而加官。故無印。止有文淵閣印。以封進御覽。此外卽支俸。皆借翰林院印。故于翰林院堂上設公座。視相公幾位。則幾座。故曰中堂。智謂今時宰相無其官而有其權地。其權之漸重。正似唐之學士。而但論機務。不論官。正似江左。遼北面有大林牙院。掌文翰曰北面都林牙。南面有翰林都林牙。林牙亦通名。如將作監都林牙。太僕有羣牧林牙。

詹事春坊本宮僚也。○詹事秦官。掌皇后太子家成帝省之。并于大長秋長信詹事。更名長信少府。又改長樂少府。又有將行



者應邵曰皇后卿也。景帝更名大長秋。或用士。或用中人。後魏有太子左右詹事。唐置詹事府。宋東宮有詹事少詹。但品俱正六。今制則詹事正三。少詹正四也。左右春坊。蓋沿北齊。及隋有門下坊。唐龍朔改門下坊爲左春坊。左庶子爲左中護。改隋典書坊爲右春坊。右庶子爲右中護。左右諭德。唐置以擬散騎常侍。貞觀改中書舍人爲中允。龍朔改贊善。今並存其名。司經局自晉以來有之。梁之典經局。唐之桂坊也。皆以洗馬領之。元有太子司經。其曰校書正字。昉于劉宋。至北齊有太子校書郎。隋司經局置正字二人。由唐宋以後宮僚可謂多矣。近日則以翰林兼充之。侍讀侍講則始于開元三季。命馬懷素。褚無量。更日



侍讀遂置此名而宋仍之漢有太子家令寺十率府衛太子率  
更令太子僕今皆省但有舍人每正旦東宮于文華門之左門  
設坐受朝賀則舍人及東宮鹵簿衛士皆選良家子爲之非官  
也十率府率更之率胡三省音所律反若是升菴弱侯音律者  
非

秘書著作史館前代分之今則皆詞林事也拾遺記黃帝有

四史宋衷世本曰沮誦倉頡爲左右史呂覽淮南皆言夏太史  
終古殷太史向摯周有五史侯國亦置如蘇墨屠黍倚相廖虢  
是也秦有太史令漢或始置談遷爲之宣帝以其官爲令行太  
史公文書修撰之職以他官領于是太史之官惟知占候而已



王莽改置柱下五史後漢至隋惟魏明太和中史職隸中書其餘多隸秘書唐或德因隋屬秘書省著作局貞觀移史館于門下省宰相監修李元紘奏罷史職其修撰史事以他官兼領宋以宰相監修修撰直館檢討無常員修撰以朝官充直館檢討以京官以上充掌修日曆及典修圖籍之事凡國史別置院于宣徽北院之東以藏之謂之編修院天聖修真宗史宰相提舉編修官以三館秘閣校理以下及京官充事畢卽停麟臺故事曰實錄院提舉如國史從官爲修撰餘官爲校討修撰之名始于唐張昌齡爲北門修撰孫逖爲集賢修撰蔡京分修撰爲三等直閣爲六等此皆謂之貼職漢圖籍所在有石渠石室延閣



廣內貯之于外府又有中丞居殿中掌蘭臺秘省及麒麟天祿  
二閣藏之于內禁後漢圖書在東觀桓帝始置秘書監一人屬  
太常晉或併入中書省惠帝復別置自是秘書之省始居于外  
東晉元康四季除著作佐郎著作西觀撰晉書隋秘書省領著  
作太史二曹龍朔改蘭臺太史天授改麟閣神龍復舊其後國  
史太史分爲別曹而秘書但主書寫校勘矣宋建崇文館招文  
院端拱初建秘閣其實秘書郎校書郎著作郎正今之史館也  
劉向校書楊雄典校已有其任而未設官名馬融爲秘書郎詣  
東觀典校書蔡邕拜郎校書東觀是卽校書郎也魏明帝太和  
中始置著作郎官隸中書省掌國史後又置佐郎劉邵爲秘書



郎出乘鹿車王肅表論秘書丞郎乘鹿車此魏制也唐龍朔爲司文郎中咸亨復舊宋初爲寄祿官元豐定名始有職掌修纂日曆祭祀祝詞則著作郎佐之職略曰初除林希爲大著豐稷爲小著是也其刊寫分貯集賢院史館昭文館秘閣則秘書郎主之高承以侍讀起于明皇吳曾引陶弘景爲侍讀起于梁漢有講郎侍講之所自也○章帝詔高才生雖不立學官然皆擢高第爲講郎張輔子蕃以郎侍講趙典拜議郎侍議禁內此其端矣

病坊言其閒也○類要曰唐以秘書監望雖清雅而實非要劇以監爲宰相病坊丞及著作郎爲尚書郎病坊秘書郎及著作



佐郎爲監察御史病坊。

大蓬言其仙也。○鄭氏談綺曰。秘書監曰。人蓬。後漢鄧章傳。時稱東觀爲老氏藏室。道家蓬萊山。王元長曲水序。記言事于仙室。謂藏室也。

視草起艸也。○淮南王安傳。上報書及賜令。相如等視草。尚書郎主作文書起艸。沈括筆談曰。學士院有視草臺。每草制。則具衣冠據臺而坐。唐有視草亭。唐太宗屬文。遣上官儀視草。詩人號上官體。李德裕傳。安邑里第有起草院。

兩制者。翰林學士爲內制。中書舍人爲外制。○李之儀姑溪集。荅吳子陽書曰。唐開元末。以翰林供奉爲學士。入院一歲。遷知



制誥。不作文書。但備顧問。參侍行幸而已。廷班隨本官若侍宴。則座次宰相下。故學士號內相。其知制誥。謂之內制。用白麻寫。從內降。付外廷宣讀。中書舍人。是宰相屬官。其知制誥。謂之外制。押案遇有所命。則申之以詞。而行下者也。今官制行。此等合改正。智按此書則當時亦未改正矣。後晉天福五季。詔翰林學士院。公事直并歸中書舍人。自是舍人晝直者。當中書制。夜直者。當內制。至齊王開運元季。復詔翰林學士。與中書舍人爲兩制。各置六員。唐永徽中。命學士一人待制。宋景德置龍圖閣待制。天聖有天章閣待制。治平有寶文閣待制。楊徽之等兩制皆預。故事。學士二員分直。有大除拜過二制。上則並召二員。謂之



雙宣。又曰雙日鎖院。隻日降麻。故亦謂之雙鎖。能改齊漫錄曰。或后謂員半千。宜畱待制。此其始也。漢但名待詔。所任亦遠。神鈴。鈴索也。○蘇續志。唐學士院深嚴。人不可入。中夜宣事。必先動鈴索。長慶中河北用兵。鈴夜作聲。鳴急則兵事急。鳴緩則兵事緩。李德裕詩曰。銀華懸院榜。風撼引繩鈴。

摘文堂。卽玉堂之署也。○元城語錄。太宗飛白書玉堂之署四字。玉堂殿名。疑或帝所造。李尋傳曰。久汗玉堂之署。宋英宗曾撤去。吳草廬秘笈云。元豐中有學士。乞摘去下二字。榜院門。詔可。是乞以殿名名其署也。續會要云。徽宗政和五年。御書摘文堂榜學士院。有花磚道。在北廳前堦。日影及五磚。爲入直之候。



李程嬾故號八磚。

假龍老龍大小龍皆龍圖之稱也。○方勺曰舊制直龍圖閣謂之假龍待制謂之小龍直學士謂之大龍學士謂之老龍總呼龍圖葉夢得曰亦稱龍閣龍學又曰吏部尚書補外則除龍圖五曹則除樞密直學士相呼謂之密學。

得周官六典之遺意者今日之六卿也。○石齋黃公曰莽倣古矣然義和司農納言合爲一官泰倣古矣然冢宰司徒司伯係之三公斯豈古乎魏道或取雲鳥之號唐則天取鸞鳳之名皆泥古而不通于今前代亦有六部然屬于省中唐戶部無版圖兵部無戎帳廂水不管山川金倉不司錢穀而職名虛設宋旣



有吏部。又有審官院。既有刑部。又有審刑院。既有兵部。又有樞密院。既有工部。又有三司使。而分散不一。誠不若近制遠矣。隱史曰。黃公以周禮二千餘季。僅見行于今日。愚獨嘆者。缺第一事也。一者何。奄寺不統于冢宰。雖有鉄牌。庸能不徹乎。鄭端簡曰。析一相而六。此其初意。詎知學士加官之爲真相邪。周官冢宰之權固重矣。然自舜禹以來。司空卽爲冢相。智別有論。周官大體是。而文字不必盡信。誠如朱子論其內外相維之善。誠如鄭節卿所論。而瑣屑不必相倣。則誠如馬貴與所論矣。宋鄭伯謙字節卿。作太平經國書。發明周禮。徐九一重刻之。又按古時命官。六卿有人。公孤之人不別見。是知公孤卽六卿而立之。猶



通考  
今六部加師保也。

省眼。天官也。○選司亦謂之南曹。亦謂左曹。司勲亦謂勲府。亦謂右闕。劉禹錫爲韋陟神道碑云。是曹在南宮爲睂目。在選士爲司命。鶴廳。考功廳也。唐考功員外廳事。有薛稷画鶴。故云。今吏部有古藤。或稱藤軒。

版部。地官也。○亦稱民部。魏有嚴部郎中。唐司徒四屬曰戶部。曰度支。曰金部。曰倉部。唐張博濟爲戶部郎中。部有考堂。天下歲會計處。司金亦稱司珍。司倉亦稱司庾。司儲。唐戶部侍郎有二員。判使按者別一署。謂之左戶。

客臺。春官也。○唐虞曰秩宗。商客爲商禮官。故稱客臺。漢郡國



有客史舊說禮部郎中掌省中文翰謂之南宮舍人杜牧頃求  
小儀小秋不遂鄭谷寄同季詩小儀澄澹轉中儀故今以爲禮  
部司務之稱石林燕語禮部郎中元豐官制行謂之名表郎郎  
官別有印曰名表郎印春明退朝錄云禮部員外爲瑞錦窠因  
話錄云祠部呼冰廳言其清冷也冰去聲

五兵夏官謂中兵外兵騎兵別兵都兵也○魏始置五兵尚書  
晉太康又置七兵尚書以中外兵加分左右也

都官秋官也○漢成帝置三公曹主獄亦曰賊曹劉宋三公比  
部皆主法又置都官尚書主軍刑獄領都官水部庫部功論四  
曹開皇始改刑部唐因之天寶改爲憲部亦曰西臺亦曰白雲



司

起部冬官也。○共工冬官。漢魏領于民曹。自晉迄陳有所營作。權置起部尚書。役竣則省。隋始置工部尚書。唐因之。領工部屯部虞部水部四曹。屯田一曰司田。







